



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

21.12.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի թիվ ԳԲԽ-ԱՄ-2017/46

Հայաստանի Հանրապետության գնումների բողոքարկման խորհուրդը (այսուհետ նաև՝ խորհուրդ) քննելով «Տարտլետ» ՍՊԸ-ի կողմից 05.12.2017թ. ներկայացված բողոքը (այսուհետ նաև՝ ԳԲԽ-ԱՄ-2017/46 բողոք) և կից փաստաթղթերը, պարզեց հետևյալը.

1. «Տարտլետ» ՍՊԸ-ի ներկայացրած փաստերը, հիմնավորումները և պահանջը.

«Տարտլետ» ՍՊԸ-ն (այսուհետ նաև՝ Ընկերություն) ՀՀ գնումների բողոքարկման խորհրդին ուղղված 05.12.2017թ. բողոքով հայտնել է, որ ՀՀ պաշտպանության նախարարության (այսուհետ նաև՝ Պատվիրատու) կողմից հացի ձեռքբերման նպատակով հայտարարվել է «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով հրատապ բաց մրցույթ (այսուհետ նաև՝ Ընթացակարգ):

Ընթացակարգի հրավերի 1-ին կետով գնման առարկան խմբավորվել է 84 չափաբաժիններում:

Ընթացակարգի հրավերի 1-ին մասի 2-րդ կետի համաձայն՝ սույն գնման ընթացակարգին մասնակցելու իրավունք ունեն այն անձինք, որոնք ունեն կնքվելիք պայմանագրով նախատեսված պարտավորությունների համար պահանջվող ...ֆինանսական միջոցներ...:

«Ֆինանսական միջոցներ» որակավորման չափանիշը սահմանվում և գնահատվում է հետևյալ կարգով՝

ա. Հայաստանի Հանրապետության ռեզիդենտ հանդիսացող մասնակցի, բացառությամբ անհատ ձեռնարկատեր չհանդիսացող ֆիզիկական անձի, հայտը ներկայացնելուն նախորդող՝

- երեք հաշվետու տարիների համախառն եկամտի հանրագումարը չպետք է պակաս լինի սույն ընթացակարգի շրջանակում մասնակցի ներկայացրած գնային առաջարկից.

- հաշվետու տարվա ընթացքում պարտավորությունների հաշվեկշռային արժեքը չպետք է գերազանցի ակտիվների հաշվեկշռային արժեքը.

բ. սույն ենթակետի «ա» պարբերությամբ նախատեսված պահանջներին իր համապատասխանությունը հիմնավորելու համար մասնակիցը հայտով ներկայացնում է իր կողմից հաստատված հայտարարություն, որի իսկությունը հանձնաժողովը գնահատում է սույն հրավերով սահմանված պայմաններով:

գ. եթե մասնակիցը չի հանդիսանում Հայաստանի Հանրապետության ռեզիդենտ կամ մասնակիցը անհատ ձեռնարկատեր չհանդիսացող ֆիզիկական անձ է, ապա սույն ենթակետի «ա» պարբերությամբ նախատեսված պայմանը չի գործում և տվյալ մասնակիցը հայտով ներկայացնում է միայն հայտարարություն: ...

դ. մասնակցի որակավորումը այս չափանիշի գծով գնահատվում է բավարար, եթե վերջինս ապահովում է սույն ենթակետով նախատեսված պայմաններն ու պահանջները:

Ընթացակարգին մասնակցելու նպատակով ի թիվս այլ կազմակերպությունների հայտ է ներկայացրել նաև «Տարտլետ» ՍՊԸ-ն:

Ընկերությունը հայտ է ներկայացրել 6 չափաբաժինների համար, և բոլոր 6 չափաբաժինների համար առանձին ներկայացված գինը չի գերազանցել գնումների բազային միավորի հնգապատիկը՝ 5 000 000 ՀՀ դրամը:

Չափաբաժին Հ/Հ	Տարածաշրջան	Չ/Մ	Առաջարկ
25	Էջմիածին 41096 գործարան	կգ	2 256 000 ՀՀ դրամ
26	Հայանիստ 43755 գործարան	կգ	2 820 000 ՀՀ դրամ
28	Մերձավան 43755 գործարան	կգ	2 256 000 ՀՀ դրամ
64	Քասախ 43755 գործարան	կգ	3 384 000 ՀՀ դրամ
66	Քասախ 93953 գործարան	կգ	1 128 000 ՀՀ դրամ
77	Երևան 50552 գործարան	կգ	3 384 000 ՀՀ դրամ
Ընդամենը	6	կգ	15 228 000 ՀՀ դրամ

Ընթացակարգի գնահատող հանձնաժողովի 11.10.2017թ. ժամը 11:00-ին կայացած նիստի թիվ 4 արձանագրության 3-րդ կետի համաձայն՝ «Տարտլետ» ՍՊԸ-ն Ընթացակարգի 25-րդ, 26-րդ, 28-րդ, 64-րդ և 77-րդ չափաբաժինների մասով ճանաչվել է առաջին տեղ զբաղեցրած մասնակից:

Պատվիրատուն, ղեկավարվելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 40-րդ կետի 3-րդ ենթակետով, 08.11.2017թ. հարցում է ներկայացրել ՀՀ ԿԱ պետական եկամուտների կոմիտե:

Կոմիտեն 09.11.2017թ. ներկայացրել է եզրակացություն, որի համաձայն՝ Ընկերության հայտը ներկայացնելուն նախորդող երեք տարիների համախառն եկամտի հանրագումարը կազմում է 951 103 ՀՀ դրամ:

Ընթացակարգի գնահատող հանձնաժողովի 17.11.2017թ. ժամը 11:00-ին կայացած նիստի թիվ 5 արձանագրության 1.1 կետի համաձայն՝ Ընկերությունը չի շտկել արձանագրված անհամապատասխանությունը՝ (ֆինանսական միջոցներ) որակավորման

չափանիշին վերաբերող որակավորման պահանջը, ինչով պայմանավորված Ընթացակարգի գնահատող հանձնաժողովը որոշել է մերժել «Տարուլետ» ՍՊԸ-ի հայտը:

Հանձնաժողովը նաև արձանագրել է, որ Կարգի 44-րդ կետով նախատեսված համապատասխան եզրակացության համաձայն, հրավերով նախատեսված «Ֆինանսական միջոցներ» որակավորման չափանիշին վերաբերող որակավորման պահանջներն առկա են մասնակիցների մոտ, բացառությամբ «Տարուլետ» ՍՊԸ-ի, որի հայտը ներկայացնելուն նախորդող երեք հաշվետու տարիների համախառն եկամտի հանրագումարը պակաս է ներկայացված գնային առաջարկից:

Ընկերությունը վկայակոչել է «Գնումների մասին» ՀՀ օրենքի (այսուհետ նաև՝ Օրենք) 28-րդ հոդվածի 1-ին մասը, որի համաձայն՝ հրավերը պետք է պարունակի, եթե գնումն իրականացվում է չափաբաժիններով, և մասնակիցներին թույլատրվում է հայտեր ներկայացնել գնվող ապրանքների, աշխատանքների և ծառայությունների միայն մի մասի համար, ապա դրա պայմանները և կարգը:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 18-րդ ենթակետի համաձայն՝ հրավերով նախատեսվում է նաև, որ գնման ընթացակարգը չափաբաժիններով կազմակերպվելու դեպքում հայտերի գնահատումը և ընտրված մասնակցի որոշումն իրականացվում է ըստ առանձին չափաբաժինների:

Կարգի 63-րդ կետի համաձայն՝ մասնակիցների՝ օրենքի 6-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝

1) հրավերով պահանջվում է, որ Հայաստանի Հանրապետության ռեզիդենտ հանդիսացող մասնակիցը, բացառությամբ անհատ ձեռնարկատեր չհանդիսացող ֆիզիկական անձի, հայտով ներկայացնում է հայտարարություն այն մասին, որ իր կողմից հայտը ներկայացվելուն նախորդող՝

ա. երեք հաշվետու տարիների համախառն եկամտի հանրագումարը պակաս չէ ներկայացված գնային առաջարկից,

բ. հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը.

2) եթե մասնակիցը չի հանդիսանում Հայաստանի Հանրապետության ռեզիդենտ կամ գնման առարկայի նախահաշվային գինը տվյալ գնման ընթացակարգի շրջանակում չի գերազանցում գնումների բազային միավորի հնգապատիկը կամ գնման առարկա է հանդիսանում անշարժ գույքի ձեռքբերումը կամ մասնակիցն անհատ ձեռնարկատեր չհանդիսացող ֆիզիկական անձ է կամ գնման ընթացակարգը կազմակերպվում է սույն կարգի 23-րդ կետի 5-րդ ենթակետի «գ» պարբերությամբ նախատեսված հիմքով, ապա սույն կետի 1-ին ենթակետով նախատեսված պահանջը չի սահմանվում հրավերով և մասնակիցը հայտով ներկայացնում է միայն հայտարարություն պայմանագրի կատարման համար անհրաժեշտ ֆինանսական միջոցների առկայության մասին:

3) մասնակցի որակավորումը գնահատվում է բավարար, եթե վերջինս ապահովում է սույն կետով նախատեսված պահանջները:

«Ֆինանսների նախարարությունը վերոհիշյալ հարցի կապակցությամբ ներկայացրել է պաշտոնական պարզաբանում, որի համաձայն՝ «Ինպես հայտնի է, ՀՀ կառավարության 2017թ. մայիսի 4-ի թիվ 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 18-րդ ենթակետի համաձայն՝ գնման ընթացակարգը չափաբաժիններով կազմակերպելու դեպքում հայտերի գնահատումը և ընտրված մասնակցի որոշումը իրականացվում է ըստ չափաբաժինների:

Սույն թվականի մայիսի 24-ի ՀՀ ֆինանսների նախարարի համապատասխան հրամաններով սահմանվել են գնումների բազային միավորի հնգապատիկը գերազանցող և չգերազանցող գնման հայտարարությունների և հրավերների օրինակելի ձևերը, որոնք տեղադրված են www.gnumner.am կայքի «Օրենսդրություն» բաժնի «Ֆինանսների նախարարի հրամաններ» ենթաբաժնում:

* Նշվածով պայմանավորված՝ հայտնում ենք, որ գնման գործընթացներ կազմակերպելիս հիշյալ օրինակելի ձևերը կիրառելիս որպես գնման առարկաների նախահաշվային գներ անհրաժեշտ է հաշվի առնել տվյալ գնման գործընթացի շրջանակներում յուրաքանչյուր չափաբաժնի գնման առարկայի նախահաշվային գինն առանձին, այլ ոչ թե բոլոր չափաբաժինների նախահաշվային գների հանրագումարը, օրինակ՝ եթե նախատեսվում է ձեռք բերել A4 ֆորմատի թուղթ և գրիչ գելային, որոնց համար ըստ հաստատված գնումների պլանի հատկացված են համապատասխանաբար 7,0 մլն. ՀՀ դրամ (2800

տուփ x 2500 ՀՀ դրամ) և 1,5 մլն. ՀՀ դրամ (2500 x 600 ՀՀ դրամ), ապա որպես նախահաշվային գին պետք է հիմք ընդունել յուրաքանչյուր չափաբաժնի նախահաշվային գինը և կամ A4 ֆորմատի թղթի համար կազմակերպել առանձին գործընթաց՝ կիրառելով գնումների բազային միավորի հինգապատիկը գերազանցող գնման հայտարարության և հրավերի օրինակելի ձևը, իսկ գրիչ գելայինի համար կազմակերպել առանձին գնման գործընթաց՝ կիրառելով գնումների բազային միավորի հինգապատիկը գերազանցող գնման հատարարության և հրավերի օրինակելի ձևը, կամ երկու գնման առարկաների համար կազմակերպել մեկ գնման գործընթաց՝ հրավերում յուրաքանչյուր գնման առարկայի համար նախատեսելով որակավորման չափանիշների առանձին պահանջներ»:

«ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգի հրավերի 1-ին մասի 1-ին կետով գնման առարկան խմբավորվել է 84 չափաբաժիններում:

Ընկերությունը, ղեկավարվելով գնումների մասին ՀՀ օրենսդրությամբ սահմանված պահանջներով, հայտը ներկայացրել է առանձին չափաբաժիններով, որոնց համար առանձին ներկայացված գինը չի գերազանցել գնումների բազային միավորի հինգապատիկը՝ 5 000 000 ՀՀ դրամը:

Ընկերության կողմից ներկայացված առավելագույն մեկ չափաբաժնի համար նախատեսված գնային առաջարկը կազմել է 3 384 000 ՀՀ դրամ, այսինքն՝ գնման առարկայի նախահաշվային գինը տվյալ ընթացակարգի շրջանակում Ընկերության կողմից ներկայացված առավելագույն չափաբաժնի մասով չի գերազանցում գնումների բազային միավորի հինգապատիկը, հետևաբար գնման ընթացակարգը չափաբաժիններով կազմակերպվելու դեպքում հայտերի գնահատումը և ընտրված մասնակցի որոշումը պետք է իրականացվեր ըստ առանձին չափաբաժինների, իսկ այս պարագայում Ընկերության գնային առաջարկը չի գերազանցել հինգ միլիոն ՀՀ դրամը, ինչի պարագայում Ընկերությունը թիվ 3 հավելվածով ներկայացրել է միայն հայտարարություն պայմանագրի կատարման համար անհրաժեշտ ֆինանսական միջոցների առկայության մասին, սակայն Կարգի 63-րդ կետի պայմաններով նախատեսված՝ պարտավոր չէր ներկայացնել որակավորման չափանիշներին համապատասխանելու մասին որևէ հիմնավորում, ինչն և Պատվիրատուի կողմից համարվել է որպես պարտավորության խախտում:

Ընկերությունը գտնում է, որ ՀՀ պաշտպանության նախարարության «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգի գնահատող հանձնաժողովի կողմից խախտվել է «Գնումների մասին» ՀՀ օրենքի 28-րդ հոդվածի 8-րդ մասով, Կարգի 32-րդ կետի 18-րդ ենթակետով, 63-րդ կետի 2-րդ ենթակետով սահմանված պահանջները:

Օրենքի 46-րդ հոդվածի 1-ին մասի համաձայն՝ յուրաքանչյուր անձ իրավունք ունի բողոքարկելու պատվիրատուի, գնահատող հանձնաժողովի և գնումների բողոքարկման խորհրդի գործողությունները (անգործությունը) և որոշումները:

Նույն հոդվածի 3-րդ մասի համաձայն՝ յուրաքանչյուր անձ իրավունք ունի սույն օրենքի համաձայն՝ նախքան պայմանագրի կնքումը բողոքարկելու պատվիրատուի և գնահատող հանձնաժողովի գործողությունները (անգործությունը) և որոշումները գնումների բողոքարկման խորհրդին:

Օրենքի 50-րդ հոդվածի 7-րդ մասի 1-ին կետի համաձայն՝ Խորհուրդը իրավունք ունի պատվիրատուի և գնահատող հանձնաժողովի գործողությունների կամ անգործության վերաբերյալ ընդունելու հետևյալ որոշումները.

ա. արգելելու կատարել որոշակի գործողություններ և ընդունել որոշումներ,

բ. պարտավորեցնելու ընդունել համապատասխան որոշումներ, ներառյալ՝ չկայացած հայտարարելու գնման ընթացակարգը, բացառությամբ պայմանագիրը անվավեր ճանաչելու մասին որոշման,

գ. փոփոխելու ընդունված որոշումները.

Նույն հոդվածի 9-րդ մասի համաձայն՝ բողոքի քննությունը բաց է հանրության համար, բացառությամբ պետական գաղտնիք պարունակող գնումների: Բողոքն ստանալու օրվանից հաշված՝ մեկ աշխատանքային օրվա ընթացքում, այդ մասին խորհուրդը հայտարարություն է հրապարակում տեղեկագրում:

Օրենքի 51-րդ հոդվածի 1-ին մասի համաձայն՝ գնումների բողոքարկման խորհուրդ ներկայացված բողոքն ինքնաբերաբար կասեցնում է գնման գործընթացը՝ սույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

«Տարտլետ» ՍՊԸ-ն բողոքով ՀՀ գնումների բողոքարկման խորհրդին խնդրել է ՀՀ պաշտպանության նախարարության կողմից կազմակերպված «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգի գնահատող հանձնաժողովին արգելել գնման ընթացակարգի մասով կատարել որոշակի գործողություններ և ընդունել որոշումներ, այն է՝ շարունակել կատարել գնման ընթացակարգի մասով որևէ գործողություն և դադարեցնել և/կամ չեղյալ հայտարարել ՀՀ պաշտպանության նախարարության «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգի գնահատող հանձնաժողովի 17.11.2017թ. ժամը 11:00-ին կայացած նիստի թիվ 5 արձանագրության 1.1 և 1.2 կետերով՝ «Տարտլետ» ՍՊԸ-ի մասով կայացված որոշումը և սույն որոշումից բխող այլ որոշումները:

«Տարտլետ» ՍՊԸ-ն, պատշաճ ծանուցված լինելով Խորհրդի 08.12.2017թ. ժամը 11:10-ի նիստի վերաբերյալ, ապահովել է իր ներկայացուցչի մասնակցությունը, ով պնդել է բողոքով ներկայացված դիրքորոշումը:

2. ՀՀ պաշտպանության նախարարության կողմից բողոքի վերաբերյալ ներկայացված փաստերը, հիմնավորումները և դիրքորոշումը.

ՀՀ պաշտպանության նախարարությունը 15.12.2017թ. թիվ ԴՎԱ/4638 գրությամբ հայտնել է, որ «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգը պատասխանատու ստորաբաժանման կողմից ներկայացված գնման հայտին համապատասխան կազմակերպվել է «Գնումների մասին» ՀՀ օրենքի 15-րդ հոդվածի 6-րդ կետի 1-ին ենթակետի հիման վրա:

Պատասխանատու ստորաբաժանումը ներկայացրած գնման հայտով, համաձայն ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 21-րդ կետի 2-րդ ենթակետի «ա» պարբերության հավաստել է, որ ընթացիկ կամ նախորդ տարիների ընթացքում տվյալ ապրանքատեսակի մասով կնքված պայմանագրեր առկա չեն և յուրաքանչյուր չափաբաժնի նախահաշվային գինը տվյալ ընթացակարգի շրջանակում գերազանցելու է գնումների բազային միավորի հնգապատիկը:

Հաշվի առնելով վերոգրյալը՝ գնահատող հանձնաժողովը հաստատել է գնումների բազային միավորի հնգապատիկը գերազանցող «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգի հրավեր, որտեղ սահմանված է «Ֆինանսական միջոցներ» որակավորման չափանիշ, ըստ որի ՀՀ ռեզիդենտ հանդիսացող մասնակցի հայտը ներկայացնելուն նախորդող երեք հաշվետու տարիների համախառն եկամտի հանրագումարը պետք է պակաս չլինի սույն Ընթացակարգի շրջանակում մասնակցի ներկայացրած գնային առաջարկից:

Քանի որ «Տարտլետ» ՍՊԸ-ի հայտը ներկայացվելուն նախորդող երեք հաշվետու տարիների համախառն եկամտի հանրագումարը պակաս էր ներկայացված գնային առաջարկից, ուստի գնահատող հանձնաժողովը մերժել է Ընկերության հայտը:

Պատվիրատուն վերոհիշյալ գրությամբ ներկայացրել է պատասխանատու ստորաբաժանման կողմից տրամադրված գնման հայտի պատճենը:

Պատվիրատուն, պատշաճ ծանուցված լինելով Խորհրդի 08.12.2017թ. ժամը 11:10-ի նիստի վերաբերյալ, չի ապահովել է իր ներկայացուցչի մասնակցությունը:

3. ԳԲԽ-ԱՄ-2017/46 բողոքի քննության համար էական նշանակություն ունեցող փաստերը

ԳԲԽ-ԱՄ-2017/46 բողոքի քննության համար էական նշանակություն ունեն հետևյալ փաստերը՝

1. ՀՀ պաշտպանության նախարարության կողմից ՀՀ պաշտպանության նախարարության կարիքների համար հացի ձեռքբերման նպատակով կազմակերպվել է «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով հրատապ բաց մրցույթ:

2. Համաձայն ՀՀ պաշտպանության նախարարության պատասխանատու ստորաբաժանման կողմից հաստատված գնման հայտի՝ «ՀՀ ՊՆ ՆՏԱԴ-ՀԲՄԱՊՁԲ-7/1» **ծածկագրով հրատապ բաց մրցույթը կազմակերպվել է «Գնումների մասին» ՀՀ օրենքի 15-րդ հոդվածի 6-րդ մասի 1-ին ենթակետի հիման վրա:**

3. ՀՀ պաշտպանության նախարարության կարիքների համար կազմակերպված «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով հրատապ բաց մրցույթին մասնակցելու նպատակով ի թիվ այլ մասնակիցների 11.10.2017թ. հայտ է ներկայացրել «Տարտլետ» ՍՊԸ-ն:

4. Ընկերությունը հայտի թիվ 5 հավելվածով ներկայացրել է գնային առաջարկ Ընթացակարգի 6 չափաբաժինների մասով, որը կազմել է՝ **2 256 000 ՀՀ դրամ՝ 25-րդ չափաբաժնի համար, 2 820 000 ՀՀ դրամ՝ 26-րդ չափաբաժնի համար, 2 256 000 ՀՀ դրամ՝ 28-րդ չափաբաժնի համար, 3 384 000 ՀՀ դրամ՝ 64-րդ չափաբաժնի համար, 1 128 000 ՀՀ դրամ՝ 67-րդ չափաբաժնի համար, 3 384 000 ՀՀ դրամ՝ 77-րդ չափաբաժնի համար:**

5. Ընթացակարգի գնահատող հանձնաժողովի 11.10.2017թ. ժամը 11:00-ի նիստի թիվ 4 արձանագրության 4-րդ կետի 4.1 ենթակետով կայացված որոշմամբ «Տարտլետ» ՍՊԸ-ն ճանաչվել է առաջին տեղ զբաղեցրած մասնակից Ընթացակարգի 25, 26, 28, 64, 67 և 77-րդ չափաբաժինների մասով:

6. Ընթացակարգի գնահատող հանձնաժողովի քարտուղարը ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 43-րդ կետի 3-րդ ենթակետի հիման վրա, 08.11.2017թ. «Տարտլետ» ՍՊԸ-ի վերաբերյալ հարցում է ներկայացրել ՀՀ ԿԱ պետական եկամուտների կոմիտե:

7. ՀՀ ԿԱ պետական եկամուտների կոմիտեի կողմից 09.11.2017թ. տրամադրվել է եզրակացություն, համաձայն որի «Տարտլետ» ՍՊԸ-ի հայտը ներկայացվելու նախորդող երեք հաշվետու տարիների համախառն եկամտի հանրագումարը կազմում է **951 103 ՀՀ դրամ:**

8. Ընթացակարգի գնահատող հանձնաժողովը, հիմք ընդունելով կարգի 44-րդ և 47-րդ կետերի դրույթները, ծանուցել է Ընկերությանը՝ առաջարկելով մեկ աշխատանքային օրյա ժամկետում շտկել արձանագրված անհամապատասխանությունը:

9. Ընթացակարգի գնահատող հանձնաժողովի 17.11.2017թ. ժամը 11:00-ի նիստի թիվ 5 արձանագրության 1-ին կետի 1.1 ենթակետով կայացված որոշմամբ «Տարտլետ» ՍՊԸ-ի հայտը մերժվել է այն հիմնավորմամբ, որ Ընկերության կողմից չի շտկվել

«Ֆինանսական միջոցներ» որակավորման չափանիշին վերաբերող անհամապատասխանությունը:

4. Խորհրդի հիմնավորումները և եզրահանգումը

Խորհուրդն, ուսումնասիրելով «Տարտլետ» ՍՊԸ-ի 05.12.2017թ. բողոքը, ՀՀ պաշտպանության նախարարության 15.12.2017թ. թիվ ԴՎԱ/4638 գրությունը և կից փաստաթղթերը, հայտնում է հետևյալը.

«Գնումների մասին» ՀՀ օրենքի 6-րդ հոդվածի 6-րդ մասի համաձայն՝ հրավերով սահմանվում են մասնակցի՝ տվյալ գնումներին մասնակցելու իրավունքը և որակավորումը գնահատելու չափանիշները, կարգը և դրա համար պահանջվող փաստաթղթերին (տեղեկություններին) ներկայացվող պահանջները:

Օրենքի 15-րդ հոդվածի 6-րդ մասի 1-ին կետի համաձայն՝ մինչև ֆինանսական միջոցներ նախատեսվելը սույն օրենքով սահմանված կարգով կարող է կնքվել պայմանագիր՝ պայմանով, որ դրա շրջանակներում գնում կարող է կատարվել անհրաժեշտ ֆինանսական միջոցներ նախատեսվելու դեպքում: Սույն մասի համաձայն կնքված պայմանագիրը լուծվում է, եթե այն կնքելու օրվան հաջորդող վեց ամսվա ընթացքում պայմանագրի կատարման համար ֆինանսական միջոցներ չեն նախատեսվել: Սույն մասը կարող է կիրառվել, եթե պատվիրատուն չի կարողանում նախապես կանխատեսել (հաշվարկել) գնումների համար անհրաժեշտ ֆինանսական միջոցների չափը

Օրենքի 28-րդ հոդվածի 1-ին մասի 8-րդ կետի համաձայն՝ հրավերը պետք է պարունակի՝ եթե գնումն իրականացվում է չափաբաժիններով, և մասնակիցներին թույլատրվում է հայտեր ներկայացնել գնվող ապրանքների, աշխատանքների և ծառայությունների միայն մի մասի համար, ապա դրա պայմանները և կարգը:

«Գնումների մասին» ՀՀ օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով

նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 21-րդ կետի 1-ին ենթակետի «բ» պարբերությունը սահմանում է, որ «...պատասխանատու ստորաբաժանումը կազմում և հաստատում է գնման հայտը, որը ներառում է մասնակիցների որակավորման չափանիշները...»:

Կարգի նույն կետի 2-րդ ենթակետի «ա» պարբերության համաձայն՝ եթե գնման ընթացակարգը կազմակերպվում է օրենքի 15-րդ հոդվածի 6-րդ մասի 1-ին կետի հիման վրա, ապա ապրանքների գնման դեպքում հայտով ներկայացվում է նաև ընթացակարգը կազմակերպելու կամ դրան նախորդող տարվա ընթացքում նմանատիպ ապրանքի ձեռքբերման նպատակով կնքված պայմանագրով (գործարքով) սահմանված մեկ միավոր գինը, եթե առկա է նման պայմանագիր (գործարք): Եթե նմանատիպ պայմանագիր առկա չէ, ապա դրա մասին հայտում կատարվում է նշում, իսկ գինը չի սահմանվում:

Կարգի 32-րդ կետի 1-ին ենթակետի «բ» ենթակետի համաձայն՝ հրավերով նախատեսվում է նաև, որ իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին:

Կարգի 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարը էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը:

Կարգի 44-րդ կետի համաձայն՝ Կոմիտեն սույն կարգի 43-րդ կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով տրամադրում է հարցման մասին տեղեկատվություն: Սույն

կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «Ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից: Սույն կետով նախատեսված որակավորման չափանիշի գնահատման ժամանակ հաշվի է առնվում սույն կարգի 47-րդ կետով նախատեսված ընթացակարգը:

Կարգի 63-րդ կետի 1-ին ենթակետի «ա» պարբերության համաձայն՝ մասնակիցների՝ օրենքի 6-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝ հրավերով պահանջվում է, որ Հայաստանի Հանրապետության ռեզիդենտ հանդիսացող մասնակիցը, բացառությամբ անհատ ձեռնարկատեր չհանդիսացող ֆիզիկական անձի, հայտով ներկայացնում է հայտարարություն այն մասին, որ իր կողմից հայտը ներկայացվելուն նախորդող երեք հաշվետու տարիների համախառն եկամտի հանրագումարը պակաս չէ ներկայացված գնային առաջարկից:

Նույն կետի 2-րդ և 3-րդ ենթակետերի համաձայն՝

2) եթե մասնակիցը չի հանդիսանում Հայաստանի Հանրապետության ռեզիդենտ կամ **գնման առարկայի նախահաշվային գինը տվյալ գնման ընթացակարգի շրջանակում չի գերազանցում գնումների բազային միավորի հնգապատիկը** կամ գնման առարկա է հանդիսանում անշարժ գույքի ձեռքբերումը կամ մասնակիցն անհատ ձեռնարկատեր

չհանդիսացող ֆիզիկական անձ է կամ գնման ընթացակարգը կազմակերպվում է սույն կարգի 23-րդ կետի 5-րդ ենթակետի «գ» պարբերությամբ նախատեսված հիմքով, ապա սույն կետի 1-ին ենթակետով նախատեսված պահանջը չի սահմանվում հրավերով և մասնակիցը հայտով ներկայացնում է միայն հայտարարություն պայմանագրի կատարման համար անհրաժեշտ ֆինանսական միջոցների առկայության մասին.

3) մասնակցի որակավորումը գնահատվում է բավարար, եթե վերջինս ապահովում է սույն կետով նախատեսված պահանջները:

ՀՀ պաշտպանության նախարարության կողմից ՀՀ պաշտպանության նախարարության կարիքների համար հացի ձեռքբերման նպատակով կազմակերպվել է «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով հրատապ բաց մրցույթ:

ՀՀ պաշտպանության նախարարության պատասխանատու ստորաբաժանման կողմից հաստատված «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգի գնման հայտով նախատեսվել է, որ «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով հրատապ բաց մրցույթը կազմակերպվում է «Գնումների մասին» ՀՀ օրենքի 15-րդ հոդվածի 6-րդ մասի 1-ին ենթակետի հիման վրա:

Նույն գնման հայտով սահմանվել է, որ ***մասնակիցներից անհրաժեշտ է պահանջել «Ֆինանսական միջոցներ» որակավորման չափանիշը՝ օրենքով սահմանված կարգով:***

Գնման հայտում նշվել է նաև, որ ***նախնական հաշվարկով յուրաքանչյուր չափաբաժնի նախահաշվային գինը փվյալ ընթացակարգի շրջանակում գերազանցելու է գնումների բազային միավորի հնգապատիկը, ընդ որում՝ ընթացիկ կամ նախորդ փարիների ընթացքում փվյալ ապրանքատեսակի մասով կնքված պայմանագրեր առկա չեն:***

ՀՀ պաշտպանության նախարարության կարիքների համար կազմակերպված «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգի հրավերի ՄԱՍ 1-ի 2-րդ կետի 2.5-րդ ենթակետի 3-րդ պարբերությունը սահմանում է, որ մասնակցին ներկայացվող «Ֆինանսական միջոցներ» որակավորման չափանիշը սահմանվում և գնահատվում է հետևյալ կարգով՝

ա. Հայաստանի Հանրապետության ռեզիդենտ հանդիսացող մասնակցի, բացառությամբ անհատ ձեռնարկատեր չհանդիսացող ֆիզիկական անձի, հայտը ներկայացնելուն նախորդող՝

- երեք հաշվետու տարիների համախառն եկամտի հանրագումարը չպետք է պակաս լինի սույն ընթացակարգի շրջանակում մասնակցի ներկայացրած գնային առաջարկից.

- հաշվետու տարվա ընթացքում պարտավորությունների հաշվեկշռային արժեքը չպետք է գերազանցի ակտիվների հաշվեկշռային արժեքը.

բ. սույն ենթակետի «ա» պարբերությամբ նախատեսված պահանջներին իր համապատասխանությունը հիմնավորելու համար **մասնակիցը հայտով ներկայացնում է իր կողմից հաստատված հայտարարություն, որի իսկությունը հանձնաժողովը գնահատում է սույն հրավերով սահմանված պայմաններով:**

գ. **եթե մասնակիցը չի հանդիսանում Հայաստանի Հանրապետության ռեզիդենտ կամ մասնակիցը անհատ ձեռնարկատեր չհանդիսացող ֆիզիկական անձ է, ապա սույն ենթակետի ա) պարբերությամբ նախատեսված պայմանը չի գործում և տվյալ մասնակիցը հայտով ներկայացնում է միայն հայտարարություն:**

դ. **մասնակցի որակավորումը այս չափանիշի գծով գնահատվում է բավարար, եթե վերջինս ապահովում է սույն ենթակետով նախատեսված պայմաններն ու պահանջները:**

Հրավերի ՄԱՍ 1-ի 8-րդ կետի 8.13-րդ ենթակետի 3-րդ պարբերության համաձայն հանձնաժողովի քարտուղարը հայտերի բացման նիստի ավարտին հաջորդող աշխատանքային օրը՝ էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղ զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև սույն հրավերի 1-ին մասի 2.5 կետով նախատեսված՝ «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը:

Նույն կետի 8.20-րդ ենթակետի 2-րդ պարբերությունը սահմանում է, որ առաջին տեղը զբաղեցրած մասնակցի կողմից փաստաթղթերն ամբողջական չներկայացվելու, ինչպես նաև ներկայացված, ներառյալ կոմիտեի կողմից տրամադրված, որակավորման չափանիշները հիմնավորող փաստաթղթերի և (կամ) ապրանքի ամբողջական նկարագրի գնահատման արդյունքում հրավերի պահանջների նկատմամբ անհամապատասխանություններ արձանագրվելու դեպքում հանձնաժողովի քարտուղարը համակարգի միջոցով ծանուցում է առաջին տեղը զբաղեցրած մասնակցին առաջարկելով մեկ աշխատանքային օրվա ընթացքում շտկել անհամապատասխանությունը: Ընդ որում ծանուցմանը պարտադիր կցվում է հանձնաժողովի նիստի արձանագրության պատճենը, որում պարտադիր և մանրամասն պետք է նկարագրված լինեն գնահատման արդյունքում արձանագրված անհամապատասխանությունները, ներառյալ ապրանքի ամբողջական նկարագրի վերաբերյալ:

Հրավերի 8-րդ կետի 8.21-րդ ենթակետի 2-րդ պարբերության համաձայն՝ առաջին տեղը զբաղեցրած մասնակցի կողմից արձանագրված անհամապատասխանությունը սահմանված ժամկետում՝ չշտկելու դեպքում հանձնաժողովի որոշմամբ հայտը մերժվում է և նույն նիստում հանձնաժողովը առաջին տեղը զբաղեցրած մասնակից է ճանաչում հաջորդաբար տեղ զբաղեցրած մասնակցին՝ կիրառելով սույն հրավերի 1-ին մասի 8.13-ից 8.20-րդ կետերով սահմանված ընթացակարգը:

«Գնումների մասին» ՀՀ օրենքի 2-րդ հոդվածի 24-րդ կետը սահմանում է, որ գնման գինը ապրանքը, աշխատանքը, ծառայությունը ձեռք բերելու համար Հայաստանի Հանրապետության կառավարության սահմանած կարգով հաշվարկված նախահաշվային գինն է:

Կարգի 16-րդ կետի 1-ին պարբերությունը սահմանում է, որ գնման գործընթաց սկսելու համար գնման առարկան պետք է ներառված լինի գնումների պլանում:

Մինչույն ժամանակ Կարգի 18-րդ կետը սահմանում է, որ Օրենքի 15-րդ հոդվածի 6-րդ մասի համաձայն գնում կատարվելու դեպքում գնումների պլանում գնման առարկան ներառվում է առանց գնման ընդհանուր գումարի նշման՝ ֆինանսական միջոցներ նախատեսվելուց հետո գնման պլանում համապատասխան լրացում կատարելու պայմանով:

ՀՀ պաշտպանության նախարարության համապատասխան պատասխանատու ստորաբաժանման կողմից հաստատված «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգի գնման հայտով (այսուհետ նաև՝ Գնման հայտ) սահմանվել է, որ Ընթացակարգը նախատեսվում է կազմակերպվել «Գնումների մասին» ՀՀ օրենքի 15-րդ հոդվածի 6-րդ մասի 1-ին ենթակետի հիման վրա, այսինքն՝ մինչև տվյալ գնման առարկայի համար ֆինանսական միջոցներ նախատեսելը:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 21-րդ կետի 2-րդ ենթակետի «ա» պարբերությունը սահմանում է, որ եթե գնման ընթացակարգը կազմակերպվում է օրենքի 15-րդ հոդվածի 6-րդ մասի 1-ին կետի հիման վրա, ապա ապրանքների գնման դեպքում հայտով ներկայացվում է նաև ընթացակարգը կազմակերպելու կամ դրան նախորդող տարվա ընթացքում նմանատիպ ապրանքի ձեռքբերման նպատակով կնքված պայմանագրով (գործարքով) սահմանված մեկ միավոր գինը, եթե առկա է նման պայմանագիր (գործարք): Եթե նմանատիպ պայմանագիր առկա չէ, ապա դրա մասին հայտում կատարվում է նշում, իսկ գինը չի սահմանվում:

Պատվիրատուի պատասխանատու ստորաբաժանման կողմից հաստատված գնման հայտում նշվել է, որ ընթացիկ կամ նախորդ տարիների ընթացքում տվյալ ապրանքատեսակի մասով կնքված պայմանագրեր առկա չեն: Միևնույն ժամանակ նույն գնման հայտում նշվել է նաև, որ նախնական հաշվարկով յուրաքանչյուր չափաբաժնի նախահաշվային գինը տվյալ ընթացակարգի շրջանակում գերազանցելու է գնումների բազային միավորի հնգապատիկը:

Կարգի 63-րդ կետի 2-րդ ենթակետը սահմանում է, որ «...եթե գնման առարկայի նախահաշվային գինը տվյալ գնման ընթացակարգի շրջանակում չի գերազանցում գնումների բազային միավորի հնգապատիկը ... ապա սույն կետի 1-ին ենթակետով նախատեսված պահանջը չի սահմանվում հրավերով և մասնակիցը հայտով ներկայացնում է միայն հայտարարություն պայմանագրի կատարման համար անհրաժեշտ ֆինանսական միջոցների առկայության մասին»:

Խորհուրդն արձանագրում է, որ «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով հրատապ բաց մրցույթի գնման առարկայի նախահաշվային գին որպես այդպիսին չի

սահմանվել, քանի որ Ընթացակարգը կազմակերպվել է «Գնումների մասին» ՀՀ օրենքի 15-րդ հոդվածի 6-րդ մասի 1-ին ենթակետի հիման վրա՝ մինչև ֆինանսական միջոցներ նախատեսվելը, հետևաբար, նախահաշվային գնի բացակայության պայմաններում, Կարգի 63-րդ կետի 2-րդ ենթակետը չի կարող կիրառվել սույն Ընթացակարգի շրջանակներում:

Միևնույն ժամանակ Ընթացակարգը կազմակերպվել է ՀՀ ֆինանսների նախարարի 24.05.2017թ. «Բաց մրցույթով էլեկտրոնային եղանակով կազմակերպվող գնումների բազային միավորի հնգապատիկը գերազանցող գնման հայատարությունների և հրավերների օրինակելի ձևերը հաստատելու մասին» թիվ 244-Ա հրամանով սահմանված կարգով, ուստի այլ որակավորման չափանիշների վերաբերյալ պահանջի հետ մեկտեղ Ընթացակարգի հրավերով նախատեսվել է 63-րդ կետի 1-ին ենթակետի «ա» ենթակետով նախատեսված «Ֆինանսական միջոցներ» չափանիշի պահանջը և այն գնահատելու կարգը:

Մասնավորապես հրավերով սահմանվել է, որ մասնակցի հայտը ներկայացվելուն նախորդող երեք հաշվետու տարիների համախառն եկամտի հանրագումարը չպետք է պակաս լինի սույն ընթացակարգի շրջանակում մասնակցի ներկայացրած գնային առաջարկից:

Ընդ որում վերը նշված պահանջին իր համապատասխանությունը հիմնավորելու համար մասնակիցը հայտով ներկայացնում է իր կողմից հաստատված հայտարարություն, որի իսկությունը հանձնաժողովը գնահատում է սույն հրավերով սահմանված պայմաններով՝ ՀՀ ԿԱ պետական եկամուտների կոմիտե հարցում ներկայացնելու միջոցով:

* Այսպես՝ Ընկերությունը հայտի թիվ 5 հավելվածով ներկայացրել է գնային առաջարկ Ընթացակարգի 6 չափաբաժինների մասով, որը կազմել է՝ **2 256 000 ՀՀ դրամ՝ 25-րդ չափաբաժնի համար, 2 820 000 ՀՀ դրամ՝ 26-րդ չափաբաժնի համար, 2 256 000 ՀՀ դրամ՝ 28-րդ չափաբաժնի համար, 3 384 000 ՀՀ դրամ՝ 64-րդ չափաբաժնի համար, 1 128 000 ՀՀ դրամ՝ 67-րդ չափաբաժնի համար, 3 384 000 ՀՀ դրամ՝ 77-րդ չափաբաժնի համար:**

Ընթացակարգի գնահատող հանձնաժողովի 11.10.2017թ. ժամը 11:00-ի նիստի թիվ 4 արձանագրության 4-րդ կետի 4.1 ենթակետով կայացված որոշմամբ «Տարտլետ» ՍՊԸ-ն ճանաչվել է առաջին տեղ զբաղեցրած մասնակից Ընթացակարգի վերը նշված բոլոր չափաբաժինների մասով:

ՀՀ ԿԱ պետական եկամուտների կոմիտեի կողմից 09.11.2017թ. տրամադրված եզրակացության համաձայն՝ «Տարտլետ» ՍՊԸ-ի հայտը ներկայացնելու նախորդող երեք հաշվետու տարիների համախառն եկամտի հանրագումարը կազմում է **951 103 ՀՀ դրամ**:

Հրավերի ՄԱՍ I-ի 8-րդ կետի 8.20 ենթակետի համաձայն՝ հայտերի գնահատումը և ընտրված մասնակցի որոշումն իրականացվում է ըստ առանձին չափաբաժինների:

Խորհուրդն արձանագրում է, որ «Տարտլետ» ՍՊԸ-ի հայտը ներկայացվելուն նախորդող երեք տարիների համախառն եկամտի հանրագումարը պակաս է Ընկերության 6 չափաբաժինների յուրաքանչյուրի մասով ներկայացված գնային առաջարկից, մինչդեռ Ընկերությունը հայտի թիվ 3 հավելվածով հայտարարել և հավաստել է, որ բավարարում է Ընթացակարգի հրավերով սահմանված որակավորման չափանիշների պահանջներին:

«Գնումների մասին» ՀՀ օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Այսպիսով Խորհուրդն արձանագրում է, որ «Տարտլետ» ՍՊԸ-ի հայտը չի համապատասխանում հրավերով սահմանված պայմաններին, ուստի Խորհուրդը գտնում է, որ Ընթացակարգի գնահատող հանձնաժողովը մերժելով «Տարտլետ» ՍՊԸ-ի հայտը, գործել է իրավաչափ:

Ինչ վերաբերում է Ընկերության այն պնդմանը, որ «Տարտլետ» ՍՊԸ-ի կողմից ներկայացված առավելագույն մեկ չափաբաժնի համար նախատեսված գնային առաջարկը կազմել է 3 384 000 ՀՀ դրամ, այսինքն գնման առարկայի նախահաշվային գինը տվյալ ընթացակարգի շրջանակում Ընկերության կողմից ներկայացված առավելագույն չափաբաժնի մասով չի գերազանցում գնումների բազային միավորի հնգապատիկը, հետևաբար գնման ընթացակարգը չափաբաժիններով կազմակերպվելու դեպքում հայտերի գնահատումը և ընտրված մասնակցի որոշումը պետք է իրականացվեր

ըստ առանձին չափաբաժինների, իսկ այս պարագայում Ընկերության գնային առաջարկը չի գերազանցել հինգ միլիոն ՀՀ դրամը, ապա Խորհուրդը անհրաժեշտ է գտնում նշել, որ **«գնման առարկայի նախահաշվային գին (գնման գին)»** և **«մասնակցի կողմից ներկայացված գնային առաջարկ»** հասկացություններ նույնական չեն: Նախահաշվային գինը գնման պլանով նախատեսված գնման առարկայի գինն է (բացառությամբ «Գնումների մասին» ՀՀ օրենքի 15-րդ հոդվածի 6-րդ մասով նախատեսված կարգով գնում կատարելու դեպքի) և ընթացակարգը գնումների բազային միավորի հնգապատիկը գերազանցելու կամ չգերազանցելու համար սահմանված կարգով ընթացակարգը կազմակերպելու ձևի ընտրության դեպքում (այդ թվում՝ Կարգի 63-րդ կետի 2-րդ ենթակետի կիրառելի լինելու հանգամանքը) հիմք է ընդունվում գնման առարկայի նախահաշվային գինը, այլ ոչ թե մասնակցի կողմից ներկայացված գնային առաջարկը:

Այսպիսով՝ հաշվի առնելով վերոգրյալը, Խորհուրդը գտնում է, որ «Տարտլետ» ՍՊԸ-ի կողմից ՀՀ գնումների բողոքարկման խորհրդին 05.12.2017թ. ներկայացված բողոքն անհիմն է և ենթակա է մերժման, քանի որ «ՀՀ ՊՆ ՆՏԱԴ-ՀԲՄԱՊՁԲ-7/1» ծածկագրով ընթացակարգը, համաձայն պատասխանատու ստորաբաժանման կողմից հաստատված գնման հայտի, կազմակերպվել է մինչև ֆինանսական միջոցներ նախատեսվելը «Գնումների մասին» ՀՀ օրենքի 15-րդ հոդվածի 6-րդ մասի 1-ին կետի հիման վրա, և գնման առարկայի նախահաշվային գին (այդ թվում նաև՝ միավորի գին) ի սկզբանե սահմանված չի եղել և հիմք ընդունելով պատասխանատու ստորաբաժանման նախնական հաշվարկը, Ընթացակարգը կազմակերպվել է գնումների բազային միավորի հնգապատիկը գերազանցող գնման համար սահմանված կարգով, որի շրջանակներում «Տարտլետ» ՍՊԸ-ի հայտը չի բավարարել հրավերով սահմանված «Ֆինանսական միջոցներ» որակավորման չափանիշի առկայության պահանջը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների բողոքարկման խորհուրդը

Ո Ր Ո Շ Ե Ց

«Տարտլետ» ՍՊԸ-ի կողմից ՀՀ գնումների բողոքարկման խորհրդին 05.12.2017թ. ներկայացված բողոքը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

ՀՀ գնումների բողոքարկման
խորհրդի անդամ՝



ՄՀԵՐ ԱՆԱՆՅԱՆ